

17,425 peluang kerjaya dalam sektor pertanian diiklankan di MYFutureJobs

ISU kekurangan pekerja dalam sektor agromakanan sering dibangkitkan oleh pihak industri dan ia menjadi kritikal ketika pandemik Covid-19 apabila kerajaan terpaksa menutup pintu sempadan negara serta membekukan permohonan pengambilan pekerja asing bagi mengekang penularan wabak ini pada pertengahan tahun 2020.

Rentetan itu, ramai pengusaha agromakanan negara yang terkesan dengan keadaan ini dan menyebabkan aktiviti pengeluaran di sektor tersebut terjejas.

Perkara ini berpunca daripada kebergantungan tinggi sektor agromakanan negara terhadap pekerja asing dan penglibatan warga tempatan yang masih kurang dalam sektor ini.

Menurut **Jabatan Perangkaan Malaysia**, sektor perkhidmatan, pertanian dan pembuatan merupakan tiga sektor utama di Malaysia yang majoriti pekerjaanya adalah bukan warganegara.

Jabatan Imigresen Malaysia turut merekodkan sebanyak 156,334 pekerja asing yang aktif di Malaysia adalah melibatkan sektor pertanian untuk tempoh sehingga 30 Jun 2019 dan dianggarkan 70 peratus daripadanya adalah di bawah subsektor tanaman.

Sehubungan itu, Jabatan Pertanian telah menganjurkan Seminar Pemadanan Pekerjaan Subsektor sebagai salah satu inisiatif kerajaan dalam membantu pemain industri subsektor tanaman agromakanan bagi mendapatkan pekerja dalam kalangan warga tempatan untuk mengatasi kekurangan pekerja dalam sektor agromakanan.

Timbalan Menteri Pertanian dan Industri Makanan I, Datuk Seri Ahmad Hamzah berkata, sebanyak 17,425 peluang kerjaya dalam sektor pertanian telah diiklankan dalam portal MYFutureJobs.

“Daripada jumlah tersebut, sebanyak 13,167 atau 76 peratus adalah merupakan pekerjaan dalam subsektor tanaman yang meliputi pelbagai kategori jawatan termasuk pengurusan dan pentadbiran, teknikal pertanian, penyelia ladang serta pekerja ladang.

“Saya berharap agar warga tempatan terutamanya para belia dapat mengambil peluang dan merebut tawaran kerja dalam sektor tanaman agromakanan. Sekali gus, dapat membantu mengurangkan kebergantungan pekerja asing dalam sektor ini,” katanya ketika merasmikan Seminar Pemadanan Pekerjaan Subsektor Tanaman di Putrajaya baru-baru ini.

Tambah beliau, mentaliti warga tempatan terhadap sektor agromakanan yang digambarkan sebagai 3D iaitu Dirty (kotor), Dangerous (bahaya) dan Difficult (sukar) perlu dikikis.

Ahmad berkata, sektor ini menyediakan peluang yang sangat besar untuk diteroka dan memberi pulangan lumayan apatah lagi disokong dengan penggunaan teknologi canggih pada masa kini.-
RELEVAN

<https://relevan.com.my/2022/06/21/17425-peluang-kerjaya-dalam-sektor-pertanian-diiklankan-di-myfuturejobs/>